

欽定剿平粵匪方略

欽定剿平粵匪方略卷三百十四 壬戌年

七月二十一日

壬寅

勝保奏言據報髮逆緊逼南

陽四圍環攻於東西南城外各築礮臺並築望
樓兩座現在開挖地道約六七日即可挖成每
日用槍礮轟擊並將護城河水挖放乾涸南路
梗阻文報難通南陽鎮總兵圖塔納於十一日
帶兵出南關擊殺賊匪千餘湖北派援之兵前

隊已到新野等語查南陽賊勢既重非大隊往
剿不能解圍而西安回氛甚熾又急須兼顧洛
陽西接潼關南鄰宛郡實爲兩省咽喉多隆阿
一軍旣爲賊阻所部之兵尙在湖北隨棗一帶
扼紮以防南陽之賊勢不能舍楚而赴陝隨棗
與南陽切近若令多隆阿就近移兵剿辦其勢
順而易成臣卽可由洛陽直趨潼關整頓各軍

進援西安如此一轉移間則陝豫兩省皆可受
益臣現飭王佐臣帶同遊擊蔡全宗等馬步各
隊三千餘名由魯山一帶進援南陽兼扼西北
竄路一面親督副都統烏勒興阿等馬步大隊
於本月十四十六十八等日分起前進馳赴洛
陽恭候

諭旨

同日鄭元善奏言據裕州知州榮泰參將盧得勝等稟報髮逆大隊盡在南陽郡城周圍紮營南至三十里屯街東至白河北至蒲山西至潦河數十里內賊蹤殆徧初九日邊馬竄至四斜樹一帶放火裏人府城信息不通城外臥龍岡鳳山等處均係賊壘並於元廟觀修築礮臺向城內轟擊城濠之水皆已放盡有暗掘地道攻

城之計又將柴草糧食牛馬器具運入四關意圖久踞萬分緊急請添兵援剿等情查參將盧得勝所帶兵勇四營係臣由洛陽檄調往援行抵裕州時值郡城被圍未能前進祇可暫紮裕州至南陽爲中州南圍要郡萬一稍有疏失不特豫省南路不堪設想卽楚北陝右亦震動堪虞接勝保函稱該大臣由槐店移師十一日馳

抵許州以南陽被圍緊急該大臣顧全大局擬
卽派撥兵勇五千馳赴襄葉援剿等語臣通盤
籌計現駐裕州兵勇僅有二千益以勝保現撥
之五千尙不及萬而城圍緊急道路不通衆寡
懸殊難操勝算且恐統馭無人必致日久貽誤
臣先其所急擬隨帶親軍馳赴許昌與勝保面
商或遵

旨駐兵洛陽該大臣親赴宛郡督勦或該大臣馳赴
洛郡卽令楊長春統師南來由臣另派司道大
員督同援勦至襄樊一帶楚省向有防兵並聞
總兵雷正綰一軍現抵棗陽正可越境會勦臣
已咨湖廣督臣官文湖北撫臣嚴樹森查照轉
飭並函致勝保暫駐許昌臣卽日啟行馳往該
處會商布置再行由許回省以顧全局均奏入

上命議政王軍機大臣傳諭官文勝保多隆阿鄭元善曰髮逆緊逼南陽四面環築礮臺並將護城河水泄乾開挖地道將柴草糧食等件運入四關城中信息不通亟應添兵助剿迅解城圍勝保現已飭王佐臣等督率馬步各隊由魯山一帶進援著飭該員等星速前進直抵宛城並著鄭元善速飭駐紮裕州之盧得勝一軍會同王佐臣等併力援

勦毋許延誤據鄭元善奏襄樊向有重兵業經飛
咨官文等分飭防兵越境會勦雷正綰軍旣爲賊
匪所隔卽毋庸赴陝著官文移咨多隆阿統帶全
軍並雷正綰一軍馳赴南陽會同勝保鄭元善所
派各軍合力兜擊以期盡殲醜類

二十二日

癸卯

毛鴻賓奏言查湖南兵勇分布東
南各省不下數十萬人其中匪類亦復不少在

營日久疊膺保擢其因事革退由帶兵大員隨時咨會者地方官猶得而約束之若告假回家則無可稽考且儼然職官卽不得不稍加優待儻從前曾經爲匪則此際更難於防範蓋往時查辦匪徒率藉團練保甲之力今旣投效行閒獲保官階自未便更咎其旣往其能知自愛者原不乏人而野性未馴復萌故態轉得恃官階

爲護身之符地方官無從猝辨團紳雖有聞見
亦且畏勢而不敢言稽查之難十倍曩昔此湖
南目前情形深可隱憂者也臣稔知在籍紳士
趙煥聯精細廉明爲里黨所翕服擬將湖南辦
團查匪事宜責成該員會同地方官妥爲經理
並請

飭下各路帶兵大員嗣後營中勇丁無論保至何項

官階凡因事撤遣及告假回籍者必各給與執照將事由限期開載明白一面行文知照地方官以備查覈如查有倚勢作威藐法橫行情事准與齊民一體查辦其私行回籍既無執照又無各營咨會者卽照逃勇例辦理庶稽查較便防範或易爲功奏入

上諭內閣曰軍興以來各路軍營召募勇丁不下數

十萬人其志切同仇殺賊立功者固屬不少亦有
曾充匪類爲鄉里所不齒一經投效漸保官階該
勇弁恃有護身之符輒告假回家儼然以職官自
命不受地方官約束甚至野性未馴復萌故態地
方官旣無可稽考各團紳雖有聞見亦且畏勢而
不敢言黨與漸多擾害鄉里亟應嚴行查辦以杜
亂萌嗣後各路統兵大員所轄勇丁無論保至何

項官階凡因事撤遣及告假回籍者均著給與執照將事由限期開載明白一面行文知照各該地方官以備查覈如該勇弁等有倚勢作威藐法橫行情事該地方官卽與齊民一體查辦毋得以曾經打仗稍事優容其有未經告假私行回籍者旣無執照又無各營咨會卽著照逃勇例從重懲辦以肅軍律而靖閭閻

二十三日

甲辰

慶端奏言閩軍克復松陽後飭令

進取處郡宣平已革知縣高樑材管帶團勇馳
抵離處城二十里之石帆分紮水營因城外之
碧湖大港頭均有賊匪屯聚六月初六日高樑
材親督巡檢沈熙治等帶隊力戰斃賊二十餘
名該逆敗退另股賊匪由箬溪嶺抄至敗匪亦
折回拒敵我軍撲入賊陣連斃賊目三名賊勢

不支分竄碧湖而去查探大港頭賊數尙多初
七日我軍疊次誘戰該逆潛伏不動高樑材令
團勇開礮轟擊先斃賊目一名賊分兩路來撲
我軍奮勇截殺斃匪數十名該逆鼠竄我軍追
至河邊殺斃溺斃之賊無數卽於是日將大港
頭碧湖踞賊悉數擊退十四日秦如虎派把總
胡榮等帶隊馳抵石帆十五日高樑材與胡榮

前往虎頭龍巖二山察看紮營地勢瞭見處郡城外有逆匪二三千人當派小隊迎剿賊卽竄入城內連日探聞賊頗畏怯秦如虎又派守備馬雲標等帶勇進紮石帆林文察於克復松陽後抽撥臺勇二千名與遊擊白瑛所部均由大港頭前進夾攻郡城松陽民團見敗逆狼狽而遁赴林文察營請借給軍火跟蹤追擊林文察

會商副將曾元福等調集民團扼守由宣平下
竄處郡之路並借給軍火令其追剿一面抽隊
繼進該逆喘息未定忽見我軍驟至紛紛竄逃
斬獲甚多於二十二日收復宣平縣治查處郡
踞匪與宣平爲犄角之勢又在碧湖大港頭分
紮賊壘以爲外援茲碧湖大港頭旣爲我軍掃
平宣平又經收復處郡賊勢已孤臣嚴催秦如

虎林文察白瑛等軍四路進取務期殄除羣醜
迅克郡城至遂昌接壤湯溪龍游此時巨股逆
匪聚於湯龍兩邑恐其乘虛抄襲當調已革道
員廖士彥統率所部馳往扼堵並將都司楊鳳
元守備徐榮生兩軍改歸調遣仍令林文察等
就近兼顧以保要衝處州府屬之縉雲縣前經
收復又有另股逆匪竄入境內臣已飭道員蘇

鏡蓉帶團掃蕩俟閩軍克復處州郡城卽令步
步進剿會攻金華

同日耆齡奏冒

臣

於六月二十九日馳赴浦城

防所准閩浙督

臣

慶端將閩省援浙各軍交

臣

接統查溫處二郡軍情前次青田逆股攻撲溫
州瑞安經總兵秦如虎等水陸各軍疊獲勝仗
該逆敗回青田官軍派隊跟剿六月十三日克

復青田賊由小溪口一帶奔竄連陷景甯雲和
偏近閩省壽甯等縣防軍迎擊獲勝上月十九
日克復雲和縣城景甯之賊亦卽退去現在溫
郡肅清並收復松陽宣平目下情形處州賊勢
亦衰大股悉聚金華境內亟應乘機進剿規復
處郡以紓福建邊防直偏金華以聯衢郡楚軍
聲勢臣卽督飭秦如虎林文察等各營及臣所

帶粵勇妥籌勦辦總期閩浙兩省官軍呼吸相應合力圖攻廓清浙境均奏入

上命議政王軍機大臣傳諭耆齡慶端曰耆齡由廣赴閩沿途遲滯至數月之久現在馳抵浦城接統慶端所部各軍本日復經簡放閩浙總督臚茲重任應如何矢發天良力圖報稱著卽督飭秦如虎等軍及所帶粵勇乘機規復處州郡城直逼金華

大張撻伐聯絡衢郡楚軍聲勢與左宗棠會合攻
剿分路夾擊以爲恢復全浙之計湯溪龍游兩縣
尙有巨股逆匪屯聚迅卽督催林文察與已革道
員廖士彥等軍奮力進攻此處一經得手卽與衢
州聲息相通縉雲甫經收復又爲另股逆匪竄入
亦卽飭令道員蘇鏡蓉激勵民團迅圖掃蕩溫處
勦賊尙爲得手各屬民團義旗競舉耆齡等務當

迎機鼓舞以順人心閩省壽甯等處與浙江邊界毗連仍須防賊突竄慶端現放杭州將軍一時不能到任著卽暫留閩省幫同耆齡籌辦防剿

耆齡又奏言查福建福甯建甯兩府所屬各縣與浙江溫處衢三府毗連路徑紛歧布置殊難周密且閩省防兵合計雖有二萬餘人內以臺灣兵勇八千餘人最爲得力而副將曾元福及

已革道員張啟煊已故遊擊賴得福所帶臺勇二千餘人均遭挫衄疲乏頗多尙須挑選裁汰可恃者實祇六千餘人總兵秦如虎所部兵勇五千餘人內漳州詔安等處兵二千餘名均不得力應行撤回可恃者實祇三千餘人合計臣隨帶粵勇共祇一萬四千餘人此外類多零星湊集孱弱無用如已革道員廖士彥等所帶樂

平
等
勇
均
須
逐
漸
裁
汰
以
省
糜
費
是
閩
省
兵
力
比
較
曾
國
藩
左
宗
棠
所
部
強
弱
迥
殊
金
陵
逆
匪
經
大
江
南
北
官
軍
四
面
進
逼
窮
蹙
思
竄
必
視
何
處
兵
力
最
單
乘
隙
衝
突
閩
省
實
當
其
衝
誠
宜
厚
集
勁
旅
以
剿
爲
防
與
左
宗
棠
一
軍
步
步
進
攻
力
遏
兇
鋒
用
衛
閩
境
查
漳
泉
等
勇
剽
悍
善
鬪
與
潮
勇
大
略
相
同
而
桀
驁
難
馴
亦
復
一
致
如
果
管
帶

得人固可得其死力查近年管帶漳泉等勇以前任浙江提督饒廷選部將畢定邦一營最爲得力嗣畢定邦中礮殞命軍威遂亦不振至閩浙督臣慶端前調漳泉各勇均因不遵軍律索餉滋鬧陸續遣散僅留五百名總緣將非其材致有此弊臣現擬會商慶端徐宗幹於將備紳士中詳加選擇求其才堪管帶漳泉勇者再行

責令選募勇丁以期一勇得一勇之用若不得
其人或於江楚等省添勁勇數千藉固閩防讎
除羣醜奏入報

聞

二十四日乙巳曾國藩奏旨准安徽撫臣李續宜

咨稱七月初六日在六安州行營接到家信親
母蕭氏於同治元年六月十六日在湖南湘鄉

縣原籍病故該撫臣係屬親子例應丁憂咨臣
代奏開缺請

旨另行簡放其前帶赴皖之提督成大吉蕭慶衍道
員蔣凝學毛有銘副將王載駟等軍歸臣節制
調度該撫臣卽奔喪回籍守制等因查李續宜
天性純孝內行敦篤茲聞母訃自應遵例丁憂
回籍治喪惟軍事方殷該撫威望素著關繫甚

重溯查咸豐八年前湖北巡撫胡林翼在任丁憂督臣官文奏請改留署任欽奉

旨胡林翼穿孝百日後仍著署理巡撫如須扶柩回籍再行告假兩箇月俟軍務告竣准其補行終制等因維時湖北巡撫印務係督臣官文兼署現擬倣照辦理已咨復李續宜將巡撫關防派員齎送安慶省城由臣暫行兼署成大吉等軍臣亦

當悉心照護妥爲訓遣惟兩淮勦撫事宜頭緒
紛繁良民各圩又感李續宜撫綏之德皖北鄂
省之兵多係該撫部下勁旅實非他人所能接
辦臣事繁才短深恐照料難周貽誤大局該撫
臣奔喪一節應否援照胡林翼丁憂之例

賞假數月仍令回皖署理撫篆抑或准其開缺守制
另行

簡放安徽巡撫之處恭候

聖裁

曾國藩又奏言近日軍情曾國荃圍攻金陵之師與賊相持常有零股前來搦戰小有撿斬未聞大仗鮑超克復甯國後臣檄令進攻東壩高淳溧陽溧水句容一帶作遠勢盤旋而來然後屯聚金陵東北隅與曾國荃相爲犄角據鮑超

呈稱軍士勞苦太久疾病甚多應請稍爲休息
再行進兵其廣德州僞保王投誠一案亦尙未
辦理妥適石清吉守廬州之十營經官文等調
令南渡助勦金陵商之李續宜另撥數營接防
廬州臣意李續宜方以全力經營苗黨自難分
撥防廬之師已咨復官文等飭令石清吉仍守
廬州無庸南渡袁甲三病狀近日不知何如李

續宜旣須離營應懇

聖恩飭留袁甲三駐紮臨淮庶兩淮上下不至空虛
奏入

上命議政王軍機大臣傳諭曾國藩李續宜毛鴻賓
曰李續宜現在丁憂本日已明降諭旨改爲署理
皖撫毋庸給假回籍從前胡林翼在湖北巡撫任
內丁憂曾經給假兩月回籍並令穿孝百日後仍

行署理巡撫惟此時皖省軍務方殷袁甲三病勢較重難再留營前已准其開缺將李續宜授爲欽差大臣令其酌量馳赴臨淮接統袁甲三營軍務皖北防剿事宜頭緒紛繁較之胡林翼在鄂時情形尤爲緊要曾國藩遠在安慶勢難兼顧李續宜若回籍兩月則皖北軍務無人統攝大局深虞鬆勁朝廷因李續宜威望素著倚畀甚殷且皖北軍

務乏人更替不得不仍令署理撫篆李續宜務當
體朝廷不得已之苦衷移孝作忠以副委任學經
從戎古有明訓李續宜亦毋得再行瀆請所有安
徽巡撫關防仍著曾國藩交還李續宜接收並著
毛鴻賓飭由藩庫給發銀八百兩經理其母喪事
著飭令該原籍地方官妥爲照料以慰該撫孝思
鮑超克復甯國後現經該大臣檄令進攻東壩等

處前據袁甲三奏報甯國克復曾寄諭該大臣詢問迄今未據將克復情形覆奏此次奏報復有鮑超克復甯國等語是否前次業已奏報中途遺失或有淹滯著卽查明迅速具奏鮑超一軍進取機宜卽照所擬辦理仍須速飭前進毋任久稽時日上諭內閣曰安徽地方現已漸就廓清惟籌辦勦撫及整飭地方一切事宜均關緊要且江南北大軍

進攻金陵賊巢皖省官軍相爲犄角李續宜自簡
任巡撫以來辦理一切深合機宜當此軍情喫緊
勢難暫令離營該撫現丁母憂著卽在軍營穿孝
改爲署理巡撫毋庸賞假回籍加恩賞銀八百兩
由該員原籍湖南省藩庫給發經理喪事並著毛
鴻賓飭令該地方官妥爲照料墨經從戎垂諸古
蹟李續宜至性純篤諒能仰體朝廷軍務爲重不

得已而破格奪情移孝作忠以副委任毋再瀆請
仍俟軍務完竣准其奏請補行回籍終制俾遂孝
思

曾國藩又奏旨准福建提督楊載福函稱原名
上一字與

御名上一字相同理應敬避擬更名岳斌懇請代奏
等情伏查

御名上一字欽奉

諭旨無庸敬避該提督踧踖不安急請更改尙不失
臣子敬慎之義相應據情代奏奏入報

聞

二十五日
丙午勝保鄭元善奏言臣勝保前以南

陽河洛並形喫緊派兵救援臣勝保卽親督馬
步全隊馳赴洛陽以扼賊匪西竄之路臣鄭元

善於十九日馳抵許州與臣勝保會商布置據
南陽府知府稟稱自初六至十六等日該逆四
面環攻並開挖地道三四處因沙鬆土陷未遂
奸謀又將城河攔壩決開放水經總兵圖塔納
等協力固守正當萬分危急湖北安襄鄖荆道
金國琛於十七日帶隊趕到該逆初猶列隊抗
拒金國琛督兵奮勦圖塔納等出城夾攻斃匪

甚衆賊勢不支適臣等所派總兵成祿馬陞副將王佐臣參將盧得勝等軍已由東北兩路進兵賊向西北山中逃竄城圍立解等語該逆遽舍南陽西竄想因大兵皆在東北無路可歸復圖窺伺陝境臣勝保已飭成祿等星夜改道由盧氏靈寶閿鄉繞前迎剿臣亦當直趨陝州潼關一帶督飭各軍盡力勦洗多隆阿一軍當亦

由西南跟蹤追歸賊勢雖衆諒不難迅就殄除
惟南陽正西一面與秦省接壤現尙無兵扼截
道路紛歧若賊由此竄入則我軍於商維二路
實有鞭長莫及之勢且賊數尙多更恐其間道
旁趨擾倡省垣臣勝保惟有相度賊勢無論在
陝在豫總與多隆阿之軍遙爲會合盡力殲除
臣鄭元善亦卽馳回省垣將盧得勝等軍酌度

緩急擇要布置以免顧此失彼至南陽一城於
援兵未到之前賊衆數萬圍攻十餘晝夜兇悍
已極經該地方文武固守待援並於解圍之日
出隊夾擊尙屬著有微勞所有南陽守城出力
人員可否准臣等擇尤酌保數員出自

恩施奏入

上命議政王軍機大臣傳諭官文勝保多隆阿鄭元

善曰此股賊匪一聞大兵雲集卽紛紛奔竄難保
不乘虛復入陝境勝保已派成祿等改道由盧氏
靈寶閿鄉繞前迎勦卽飭痛加截擊該大臣由襄
城前進自可直趨陝州徑入潼關著卽督飭各軍
奮力埽蕩鄭元善務飭盧得勝等軍視賊所趨跟
蹤追勦俾該逆喘息不定則殄除較易勝保等所
稱多隆阿一軍亦必由西南追躡惟正西一面與

秦接壤現尙無兵扼截若賊竄往商維一路實有鞭長莫及之勢自係實在情形多隆阿現在駐軍何處著官文酌量緩急卽令該將軍督率所部扼要截勦雷正綰一軍現駐隨棗並著官文飛飭該鎮統兵繞出賊前迎擊鄖西防兵相距較近官文一併酌量調派前往堵禦金國琛所帶兵勇已抵南陽卽可會同鄭元善派出各軍併力攻擊務將

此股逆匪悉數殲除毋令竄入秦中潼關扼秦豫
之衝勝保入關後應否留兵駐守著勝保鄭元善
會商布置馬陞前已簡放太原鎮總兵晉省防務
喫緊且少統兵大員著勝保卽飭該總兵速赴新
任以專責成其南陽府城文武員弁固守待援不
無微勞足錄著勝保鄭元善擇尤酌保數員毋許
冒濫

欽定勦平粵匪方略卷三百十五

壬戌年

七月二十六日

丁未

曾國藩奏言鮑超圍甯國之

師六月初八初十等日屢獲勝仗十二日進紮
城根十四日大戰全勝殺賊極多卽於十五日
克復甯國府城曾國荃一軍派隊進勦秣陵關
等處兩次獲勝六月初六日援賊數千前來窺
營隔濠放槍各有傷損未經交仗而退聞援賊

到金陵者已有數萬計秋間當有大戰目下甯國已克鮑超之兵儘可援應金陵無孤軍寡助之虞多隆阿將赴陝西慮金陵兵力太單頃接官文多隆阿會咨已調駐守廬州之石清吉十營令其齊赴金陵爲會國荃一臂之助今甯國已復鮑超之全軍足資游擊南岸之兵力足敷調撥石清吉十營或可仍防廬州不遽南渡臣

當與官文多隆阿函商妥辦湖州失陷後聞城中被害不過數百人道員趙景賢尙未殉節應俟查明實在下落再行具奏至甯國詳細戰狀俟接到鮑超文牘續行奏報

曾國藩又奏言欽奉

諭旨飭查林福祥降賊爲僞官等情查林福祥於未奉

密諭之先早經行抵江西省河由藩司李桓派員解
往浙江撫臣左宗棠軍營茲接左宗棠函稱林

福祥劉齊昂米興朝先後赴浙江衢州投到張
威邦甫至滁州傷病舉發接准袁甲三咨會後
卽委道員許厚如等於五月二十七日押解起

程詎在途病劇三十日在全椒縣身故查張威
邦業經病故應請無庸置議林福祥劉齊昂米

興朝等三員既至衢州若再由衢解皖則水陸
千餘里途次或虞疏失已函致左宗棠請嚴鞫
確情分別定擬就近奏結以免巨案久懸其情
節尤重者卽在浙境正法使人人知有守土之
責庶幾懲一儆百不敢玩視

國憲至恆起一員尙未知避匿何所容臣查明去
向務獲解營與現由上海解到之貴廷芳陳步

高二員併案訊辦

同日李鴻章奏言青嘉各城踞賊誘之既不來戰必須官軍移營進逼次第攻取爲先發制人之計臣密飭李恆嵩探明進攻青浦路徑於河港歧出處搭造浮橋以利師行派令副將程學啟滕嗣武通判韓正國等各率兵勇於七月初七日自虹橋拔隊前往北簞山距青城十餘里

相地築營參將劉士奇郭松林各率所部紮塘
橋後路又派李鶴章帶親兵馳往督攻初十日
各營先後到齊又調副將華爾由松江帶隊來
會定議進攻日內計可抵城容將攻勦情形再
行續奏至浦東金山衛城克復後責成知府潘
鼎新等以所部分駐要隘益以守備吳長慶一
營勇目吳建瀛三營歸併扼守臣復委臬司劉

鄒膏前往會商潘鼎新查勘海塘及河道形勢
加工濬修爲穩守計據稱海塘外灘宜開長濠
塘內迤北舊河西接黃姑塘向南繞至金家橋
東歸張堰大河節節皆須挑濬俾河路曲折皆
通水師可以駛入援應再勘得衛城東面海塘
受潮怒激塘埂衝賸不過幾尺勢甚危險已飭
籌款趕緊修築藉地利以省兵力

並飭李德麟等設法堵剿六月閒江洋盜劫之
案日凡數起臣商調副將華爾帶輪船隊伍於
七月閒出吳淞口就近剿劉河賊巢毀賊卡三
處攻奪該口內新老兩鎮救出商船三十餘隻
難民數百人斬髮逆七八百人其自楊林口而
上接連通靖江港紛錯可以偷渡者何止十餘
處竊意江南全局鮑超由東壩進曾國荃由金

陵進秋冬後賊必不支上游無隙可蹈恐併出
南岸各口就食於裏下河州縣而狼福江面遼
闊一經偷渡衝入通如卽成噬臍之患臣每與
督臣曾國藩緘商深爲焦慮署提臣黃翼升所
帶水師皆長龍三板於洋面風潮沙性實不相
宜現在暫留副將陽利見蔡東祥所部四十船
巡防三江口兵力單薄勢難兼顧他處其餘一

百數十號調入松江泖澱各湖尙不敷用曾秉忠礮船現已裁撤大半台之黃翼升新營祇可專力湖防至於通靖江防應仍責成黃彬所部師船嚴扼北竄計年內外赫德購到船礮定可得用或俟九狀洲克復由督臣曾國藩商之楊岳斌彭玉麟分軍下駛則一切皆資整頓不獨爲外江內河設防已也惟目前別無救急之法

可否

飭下都興阿黃彬妥籌布置嚴飭諸鎮將實力防禦
通靖泰興各口岸儻有疏虞俾賊闖入裏下河
卽惟分防之鎮將是問再上年都興阿黃彬請
調廣東紅單船四十號所需餉項現實無款可
籌查水師各幫內原雇紅單船七十七隻兼之
大洋艦快蟹拖罾各項戰船共三百餘號目下

縱有抽減如以船身稍舊者碇泊駐防以其堅固者出江堵擊似尙足敷調撥應請

飭令都興阿黃彬暨廣東督撫臣將前調紅單等船四十號卽行停止如已報起程無論駛至何處卽令折回毋庸來江以節糜費

李鴻章又奏言蘇州逃出僞職劉萬東來營投誠臣面加訊詰據供親見僞天王洪逆於六月

二十八日由南京挈眷移至蘇城改蘇郡曰天
京僞忠王李秀城自將各軍往金陵援救聞東
壩溧水俱被官軍攻破等情無論此言確否賊
勢已形衰散查左宗棠蔣益澧各軍擬由衢州
分進金嚴浙東米糧缺乏僞侍王李侍賢一股
似難逞志僞忠王擁衆數十萬將來如山金陵
敗回勢必合股另圖竄踞松滬與蘇州接壤已

飭水陸各軍嚴密堵剿均奏入

上命議政王軍機大臣傳諭曾國藩李鴻章曰鮑超
一軍旣已克復甯郡自可山東壩等處與曾國基
會師金陵曾國藩旣不慮孤軍寡助似大局已有
把握探堪欣慰據李鴻章奏秋冬以後賊勢不支
恐併出南岸就食於襄下河州縣所言不爲無見
多隆阿雷正綰等應否分撥一軍前往扼紮之處

著曾國藩妥籌具奏蘇州逃出投誠之劉萬東供稱洪逆於六月二十八日由南京挈眷來蘇改蘇郡曰天京李秀城自率羣賊往金陵救援聞東壩溧水俱被官軍攻克如所供果實是賊勢已形衰散著曾國藩速飭曾國荃等設法進攻迅圖克復該逆巢穴旣破則蘇郡踞匪勢成釜底遊魂其林福祥米興朝恆起等據左宗棠奏該員已先後赴

營惟況文榜吳再升陳步高貴廷芳尙未解到請
飭速解已諭令左宗棠就近審擬辦理除貴廷芳
陳步高二員本日據曾國藩奏現經解到皖營卽
著曾國藩訊明懲辦外其況文榜吳再升二員著
李鴻章查明速解左宗棠軍營李鴻章密飭參將
李恆嵩探明青浦路徑令程學啟等各率所部進
攻又調華爾由松江帶兵來會兵力不爲不厚著

卽激勵該員弁等直抵城下務將青浦縣城趕緊克復其金山衛城著飭知府潘鼎新等慎密防守毋得稍有疏虞衛城東面海塘被潮衝激勢甚危險卽著照該署撫所議籌借款項分別修築

上又命議政王軍機大臣傳諭都興阿曰甯國郡城業經鮑超克復該提督已由東壩等處會合曾國荃各軍進攻金陵該逆被勦窮蹙勢必渡江奔突

裏下河各州縣亟宜嚴密設防以保完善著都興
阿等速飭水師鎮將員弁將通靖泰興各口岸實
力防禦晝夜梭巡毋得稍有疏虞致該匪乘閒偷
渡至所謂紅單等新船入江而舊船仍未能卽撤
必須另籌新餉現當蘇餉艱窘勢難再議增添據
李鴻章奏稱江面水師各項戰船共三百餘號縱
有抽減如以船身稍舊者碇泊駐防以其堅固者

出江堵擊似尙足敷調撥添調一事李鴻章慮餉
無所山亦屬實情且紅單船水勇多係粵省亡命
之徒與粵匪難免熟習勾通前此江南用之有害
無利當此軍情得手大局已有轉機尤宜慎益加
慎都興阿向能通籌大局著察看情形如前次奏
調紅單等船四十號可以毋須來江卽著迅速奏
請停止一面行文廣東督撫截追回粵

同日左宗棠奏言前因衢州南北兩路喫緊臣
由開化回軍五月初四日馳抵衢州詢知侍逆
李侍賢糾集賊黨由龍游蘭谿壽昌上犯於北
路峽口一帶聯營三十餘座並盤踞杜澤雲溪
等村又令馮天義李逆等於南路石室街築成
四壘東路大洲全旺安仁埠等處各築數壘相
爲犄角臣察北路地勢緊連遂安開化常山賊

勢較重適江西撫

臣

調屈蟠王德榜兩軍赴浙

會勦臣當飭其會合總兵劉培元一軍進駐江

山以防石室街之賊親率各軍由北路進勦其

東路安仁埠一帶之賊飭總兵郭起舉等憑河

堵截十三日

臣

率各軍進紮雲溪十五日分三

路進攻裏外黃蓮花等處賊巢楊昌濬等營由

右路進劉典等營由中路進李耀南等營由左

路進崔大光等營從後接應我軍右路甫至良
山涼亭而蓮花洋塘盈川之賊先已列隊田壘
並挑悍賊數千過河而陣張聲恆率勇先進槍
礮排擊賊即敗退追至田壘賊復張兩翼來抄
我軍悉力抵禦斃騎馬賊目數人賊勢稍卻乘
勝追至河邊待逆李侍賢揮騎賊向前衝突楊
昌濬率親兵往來堵禦斃悍賊數十人適我軍

由左路進攻峽口者斃賊二百餘人破賊壘三座楊鼎勳復由蓮花過河燒賊大壘一座殺悍賊數十人侍逆知左右兩路俱敗紛紛遁走我軍復追數里始整隊而還六月初七日臣飭劉典督軍由左路進攻裏外黃之賊楊昌濬督軍分列艮山涼亭一帶會攻蓮花洋塘盈川之賊我軍左路行抵童村山上瞭見外黃村莊甚大

賊壘堅固劉典遂譚各營嚴陣村前裏黃外黃之賊見我兵無多遙擁而來我軍各路齊進無不以一當百賊敗退入壘燃放槍礮我軍踰濠而入賊勢不支適楊鼎勳等所部由峽口繞至外黃後山揚旗而下羣賊驚駭棄械狂奔中右兩路見左路得手卽乘勢分道進攻蓮花壘中之賊亦悉遁走追奔二十餘里將沿途賊壘踏

平是役斃悍賊數百名生擒六十名救出難民以數千計下自盈川上至裏外黃數十里閒賊壘三十餘座一律踏毀其南路石室街東路大洲之賊聞北路賊巢旣破驚怖殊甚初九日劉培元李定太會同屈蟠王德榜各率所部由南路進剿賊聞官軍大至棄壘狂奔各營急起追之大洲之賊亦遁沿途斃賊百數十名衢州東

南兩路賊壘亦一律踏毀淨盡敗賊紛竄龍
蘭谿查首逆李侍賢自五月十五日經官軍擊
敗後是夜由龍游退回金華嗣竄永康近又有
竄湯溪之信賊蹤飄忽靡常意在抄襲臣軍後
路臣先擬衢州江山兵力足資堵截卽當由壽
昌淳安直搗嚴州以規省會近探杭州守賊無
多賊之大勢趨重金華自應併力先將龍游壽

昌蘭谿湯溪等處次第攻勦撤其藩籬犁其巢
穴然後分兵嚴處以收破竹之勢蔣益澧所部
十七營已抵湘南臣又飛札催之到浙約在七
月臣軍新募之勇已陸續前來劉培元所部三
千二百人現正造船調礮添設水師一俟就緒
相機布置

左宗棠又奏言台州地瘠民強上年逆首李侍

賈竄陷後分遣逆黨散踞各縣爲縱橫海上之計李侍賢旋以官軍入浙急思抗拒乃由台州回竄金華賊目李鴻釗等在台大肆淫掠士民不堪其毒因倡義討賊各相糾率出賊不意擊之旬日之間連攻郡邑斃賊五六萬賊目皆就擒斬出力士紳台黃以道員蘇鏡蓉爲最仙居以副貢生吳琮爲最而吳琮以其父被害殺賊

報仇英烈之風尤足矜式鄉里定海解圍後議
克鎮海厥後克復甯波多得布興有布良有之
力布興有在洋橫行有年熟習海上情形前浙
江臬司段光清撫而用之以護商旅此次陳世
章張景渠用之亦得其力甯波旣克敗賊遁入
紹興台郡旣克敗賊萃於處郡溫州之賊畏台
郡士民之乘其後由處郡回竄金華就現在局

勢冒之裏賊中央絕其紛竄似亦浙事一大轉
機臣現飭代理台州府知府崑齡於赴任之便
詳察各處情形及實在出力士民分別安撫獎
勵諭蘇鏡蓉吳琮等互相聯絡以收衆志成城
之效一面檄委署甯紹台道史致謬先由安慶
雇坐輪船駛赴上海由定海鎮海以抵甯波察
看情形並經理稅釐事務是否堪以養兵若干

隨時馳稟以便覈酌並調段光清及甯波紳士
陳政鑰隨同經理

左宗棠又奏言據江蘇候補知府趙炳麟自安
慶發稟接上海來緘探聞湖州府城已於五月
初三日失守其詳細情形尙俟續探稟報查湖
州府城孤懸賊中紳民苦守數月之久卒以食
盡無援致有此變臣忝膺疆寄未能迅速援剿

卷之三
三
咎無可辭應請

旨將臣交部嚴加議處其一切詳細情形容俟查明具奏

左宗棠又奏言浙省失事文武各員疊奉

諭旨交臣查辦現已革總兵米興朝羅大春布政使林福祥織造恆起俱先後赴營投到此外尙有副將余永椿署杭嘉湖道劉齊昂金華府知府

王桐署金華府知府徐慮善皆係失事之員亦
陸續自行來營均飭交代辦藩司蘇式敬署衢
州府知府吳艾生派員看守訊取供詞統候分
別情罪重輕定擬另行具奏請

旨其逃赴上海之已革總兵況文榜吳再升副將陳
步高貴廷芳等迄今尙未解到應請

飭下江蘇撫臣將該革員等迅速解赴臣營歸案審

辦奏八

上命議政王軍機大臣傳諭左宗棠曰該撫本擬由
嚴州進規省垣現因龍游等處賊黨分布擬先撤
其藩籬犁其巢穴然後分兵嚴處以收破竹之效
隨機決策甚合機宜卽著由龍游等處進剿若金
華克復則規取省城更易得手惟蔣益澧所部尙
在湘南本日已諭毛鴻賓速備餉需催令赴浙並

著左宗棠迅速迎提劉培元一軍抵浙後正在造船調礮添設水師亦屬軍行必不可少卽檄令妥爲辦理台州各屬士民深明大義奮勇殺賊該撫旣知蘇鏡蓉吳琮最爲出力布興有等頗能勦賊不妨奏請獎敘藉以收拾人心米興朝等逃潰滋擾各情已屬罪無可逭而林福祥以方面大員靦然投賊尤爲罪不容誅著左宗棠於審明後應正

法者一面傳旨先行正法一面奏明庶喪心昧良
之員不致久稽顯戮以肅軍律陳步高貴廷芳二
員已經李鴻章解交曾國藩軍營審辦如應有質
訊之處卽行咨詢毋庸解赴浙江況文榜吳再升
二員已諭李鴻章迅解浙營湖郡雖係該撫統轄
之地而隔於形勢無從救援情屬可原所請交部
嚴議之處著加恩寬免其失守情形並趙景賢等

下落著查明具奏

上又命議政王軍機大臣傳諭毛鴻賓曰據左宗棠奏蔣益澧所部十七營已抵湘南現在浙省溫台衢甯等郡縣均已收復左宗棠急盼援兵攻剿金華著毛鴻賓即將蔣益澧所部餉需迅速籌備剋日催令拔營前赴浙江聽候左宗棠調遣毋稍稽延

上諭內閣曰官軍踏毀衢州東南北三路賊壘地方
一律肅清勦辦尙屬得手著左宗棠親督各軍由
龍游等處進勦次第克復各城其台州紳民倡義
討賊旬日間連復郡縣斃賊五六萬人該紳民等
敵愾同仇深知大義殊堪嘉尙著左宗棠傳旨嘉
獎並將台州等處出力紳民查明酌保用昭激勸

二十七日

戊申

官文多隆阿奏言

臣

多隆阿援陝

各軍五月十三四日先後自廬郡起程由六安
商固等屬兼程前進時值炎熱兵勇間有患病
者臣多隆阿亦因沿途感受暑溼忽患瘡痢六
月初八日起至鄂省連日醫治尙未大愈查東
征水陸各軍合攻金陵功虧一簣臣多隆阿以
陝省軍務喫重勢難兼顧屢接曾國藩緘商臣
官文擬調駐守廬郡之總兵石清吉十營馳赴

金陵以益江南之師與臣多隆阿籌議意見相同已飛飭石清吉剋日前進與江蘇藩司曾國荃會合攻剿其廬郡要地咨行李續宜酌撥數營前往以資防守惟髮逆死黨因四眼狗陳玉城伏誅後豕突狼奔遊魂無定捻逆亦乘機竄起到處焚掠若不先其所急必致蔓延西北數省貽患尤鉅是以臣多隆阿督率馬步由南陽

府各屬河洛一帶分道進兵先除潼關以外髮
捻各逆保全秦晉要地節節掃蕩剋期入關奏
八

上命議政王軍機大臣傳諭官文曾國藩多隆阿曰
多隆阿督率馬步由南陽府各屬河洛一帶分道
進兵先除潼關以外髮捻各逆保全秦晉要地現
在南陽雖已解圍而匪蹤西向勢已蔓延該將軍

未知現已行抵何處亟須將南陽西竄之匪勦辦肅清仍俟曾國藩檄調駐紮爲金陵後路援應其雷正綰一軍現在隨棗前命官文飛飭該總兵繞出賊前迎擊著仍遵前旨辦理杜賊入陝之路並仍將勦賊情形隨時馳奏以慰廑念昨據曾國藩奏甯國克復鮑超一軍山東壩等處進規金陵與曾國荃聯絡聲勢李鴻章奏洪逆挈眷赴蘇並聞

東壩溧水俱經官軍攻克似此情形金陵逆匪漸成釜魚檻獸不難得手廬州石清吉十營是否業已調到金陵廬郡亦係要地李續宜所部是否足敷分撥多隆阿雷正綰之軍應行駐紮何處最要之地著曾國藩察看具奏

官文又奏言逆匪裹脅數萬之衆盤踞鄖西窺伺鄖郡圖竄襄樊臣與撫臣嚴樹森以何紹彩

一軍兵力較單當飭鄖郡文武將城守事宜嚴
密布置一面飛催金國琛所派總兵彭炳武等
率領所部馳赴鄖郡會合各軍由界牌嶺等處
分道進剿金國琛駐紮均州上顧鄖陽下保河
口並令雷正綰一軍迅赴鄖西山陽一帶迎頭
截擊詎該逆偵知大軍齊進於五月二十五夜
間焚燒城鄉房屋分股由馬安次溝香口等處

逃竄我軍整隊馳勦管帶水師之同知周有全
會同把總鄧金榜等各帶兵勇由天河口趕至
離東門外五里地方適遇逃賊千餘人周有全
等奮力合擊轟斃賊匪四十餘名生擒長髮老
賊五名訊明正法救出難民四百餘人當於二
十六日將城池收復鄖屬已漸肅清惟探報敗
匪繞竄均州有窺伺光化河口及隨州棗陽之

意臣已會商嚴樹森飭駐紮均州之金國琛嚴密戒備力勦狂氛並飭何紹彩一軍搜捕鄖屬餘逆奏入

上諭內閣曰逆匪盤踞鄖西經總兵彭炳武等軍截擊該逆分股由馬安次溝香口等處逃竄官軍整隊馳擊斃賊四十餘名生擒長髮老賊五名正法救出難民四百餘人當將鄖西縣城克復鄖屬漸

就肅清仍著官文等飭令各軍嚴密防剿搜捕敗
匪毋留餘孽

同日杭州將軍慶端奏言五月十二日賊由青
田之西坑竄入七都逼近景甯代理景甯縣知
縣管書勳當與在城文武分帶兵勇防守隘口
詎溫郡瑞安敗逆由青田嶺根繞越十三日竄
至離城十里地方正調兵勇回堵賊已竄入縣

治十六日管書勳等集團三千餘人督帶進取
秦順民團越境助剿該逆竄逃景甯縣治卽於
是日收復十四日賊由景甯之泗洲嶺竄入雲
和縣治十五日窺伺龍泉經署臬司張銓慶督
勇擊退並添派兵勇馳赴雲和助剿十六十七
等日與賊接仗均有斬獲署雲和縣知縣柯沅
激勵鄉團進攻於十九日收復縣治賊向麗水

之大港頭而遁溫郡敗賊數千擾及青田之九
都白巖趨重泰順道員曾憲德派委員林用霖
等督帶團勇出擊該逆回竄瑞安縣之大畧千
總施渠英帶勇赴湖石堵禦二十日知縣徐承
禧由平陽坑出隊大股逆匪已渡湖石而來我
軍先勝後挫徐承禧骹受矛傷退回平陽其馬
輿防勇聞警潰回該逆遂犯平陽縣城已革道

員張啟煊親率弁勇迎敵陣斬逆匪三百餘名
賊奔平陽坑鬪聚二十一日大股逆匪圖撲張
啟煊營盤張啟煊督率遊擊李朝安等力勦斃
賊無數餘匪梟水而逃亦經勇團截殺無遺現
催總兵秦如虎與張啟煊分路進取總兵林文
察等軍因雨未能開仗近漸晴霽並經飛催奮
力攻勦迅拔處郡松陽各城一面分派兵勇馳

赴雲和堵截杜其旁竄至景甯雲和雖無城池
可守惟該管文武均不能力遏兇鋒咎有應得
且雲和被匪竄陷情形未據柯沅詳細稟報有
無逃避情事均俟確查一併奏參平陽潰退員
弁亦俟查明參辦以肅軍律奏入

上諭內閣曰浙江賊匪由青田竄陷景甯經代理該
縣知縣管書勳等集團進攻立將景甯縣治收復

該逆復由景甯竄陷雲和縣治經署該縣知縣柯沅等激勵鄉團攻勦復將雲和縣治收復其瑞安屯聚大畧之匪撲擾平陽縣城經革員張啟煊等迎勦斃匪無算餘匪梟水逃逸亦經勇團截殺無遺仍著督飭各軍乘勝分路進攻迅掃逆氛景甯雲和兩縣文武員弁於賊擾時不能實力堵禦致被竄陷均難辭咎並署理雲和縣知縣柯沅有無

聞警先逃情事著耆齡左宗棠分別查明據實叅
奏其平陽帶兵潰退各員弁著一併查明叅辦